

باطوم

احبای ایرانیان علیهم بهاء الله الأبھی

سوگلی یارانم دوستم محمد خان حضرتلری ارض مقدس دن ایرانه عودت ایدریکن باطومده بولنان شانلی ایرانلی یارانمزی تطیب خاطر ایتمک اوزره سزه خطاباً ترکجه بر تحریرات مشفقانه پرقیمتی رجا ایتمکدهدر بز ایسه معتاد بولندیغمز لسان یالکز فارسی و عریدر فقط اوراده بولنان یاران حقیقی و احبای صمیمی اکثرلری ایرانلی ترکان پاکان بولندقلری جهته تحریراتی ترکجه یازمق فی الحقیقه ده اولی در مقصد اصلی ایسه آنجق معانی دلنشین و مضامین شکریندر هر نه لسان ایله اولورسه اولسون مطبوعدر مقبولدر مرغوبدر بناءً علیه معتاد اولمدیغم لسان ایله شو تحریراتی یازدیران آنجق سوق محبتدر احساسات وجدانیته و انبئات روحانیته صهبادر الفاظ و کلمات ایسه جام مصفادر صهباء جانفزا نشئه بنخشا اولدیغی حالده قدحه او قدر اهمیت یوقدر وارسون طیراقدن چوملک بر چناق اولسون نشئه صهباء و لطافت باده حمرا کافی وافیدر حضرت احدیت بزم السنده جام ابریز محبتی لبریز و نشئه انگیز بیوروب عزیزلری سرمست پیمانۀ عهد و پیمان ایلدی او نشئه روحانی روحانیانک دماغنده دوام و استمرار ایتمکدهدر بناءً علیه سرمست جام الست اولان یاران می پرست هر زمان جمال ذوالجلاله مفتون و سعادت ابدیهیه مقرون درلر سبحان الله بو نه عنایتدر بو نه موهبتدر حقاً قدرنی تقدیر ایتمک آنجق اهل عرفانه مخصوص و واقف اسرار نهانه مرهوندر یوخسه طیب مشمومدن هر مزکوم محروم اولدیغی گبی غافلان دخی نشئه صهبای السندن بیخبر بر طاقم تن پرور و خلق ایسه البقر علی صورة البشر درلر بناءً علیه سراج هدایتی زجاج قلوبده ایقاد ایدن حضرت کبریایه شکر اولسون که بزم گبی هجران و حرمانه مبتلا اولان بندگانی خلوتگاه احدیته دلالت و درگاه الوهیه هدایت بیوردی بز هر نه قدر اهل قصورز او رب غفوردر بز عباد پرخطایز او خداوند پرعطادر دقت ایتملی باقک بز محروم ایدک محرم راز ایلدی مایوس ایدک عجز و نیاز ایله دمساز ایلدی بی سر و سامان ایدک ملجأ و پناه احسان ایلدی مادام بو فیض قدیم ایله گوگلری تزئین بیوردی شکرانه ایله مقابله ایتمک لازمدر شکرانه ایسه حقیقت انسانیتهیه تزیین ایدن اک پارلاق فضائل و خصائل حمیده ایله متصف اوله رق بین البشر سنوحات رحمانیهیه مظهر اولمق عالم انسانیتهیه بیوک بر خدمت ایتمک و کافۀ بشر ایله حسن معامله ایلمک مهربان اولمق و عموم ایله صداقتچه دیانتچه امانتچه معامله بیورمق و جناب حقّه عبادت و عبودیت ایتمکدر بر ده هیکل عالم امراض مزمنه ایله بیمار و معتل اولمشدر بناءً علیه جناب کبریا بر طیب دانا و حکیم توانا انتخاب بیوروب بو هیکل مجسمک معالجه سنه دلالت بیورمشدر عالم وجودک صحت و عافیت و سلامتی نقطه نظرندن بو بر بیوک احساندر اما نه فائده که انسانلر جاهل و بشر بیخبردر ربم سزی تأیید بیورسون و توفیق ایلسون تا که سنوحات رحمانیه ایله عالم انسانیتهیه نورانی و روحانی بیوروب نتیجه هدایت اولان حیات ابدیهیه و سعادت سرمدیهیه موفق بیورسون آمین